



Komuikadu Imprensa **23 Jullu 2018**

Ekipa Advokasia Sosiedade Sivíl husu Ministru Justisa Oetavu-Governu Konstitusionál atu kriminaliza inestu

Ekipa Advokasia Sosiedade Sivíl ne'ebé kompostu husi JSMP, ALFeLa, Fokupers, no Pradet husu Ministru Justisa Oetavu-Governu Konstitusionál atu kriminaliza inestu durante hasoru malu ho Sua Exelénsia Ministru Justisa Sr. Manuel Carceres ho ninia asesora iha salaun enkontru Ministériu Justisa, iha Sesta-feira, 20 Jullu 2018, Kaikoli-Dili.

Audiénsia ne'e hahu ho introdusaun ekipa advokasia sosiedade sivíl no objetivu kona-ba audiénsia ne'e hodi apresenta JSMP no ALFeLa ninia pareser iha relasaun ho alterasaun Kódigu Penál liuliu kria alinea espesífiku hodi kriminaliza inestu.

Ekipa Advokasia ne'e informa ba Exelénsia Ministru Justisa katak asuntu inestu ne'e hanesan asuntu pendente ne'ebé antes ne'e ekipa advokasia halo ona esforsu hodi apresenta asuntu refere ba iha instituisaun relevante sira iha Governu anteriór, liuliu iha Ministériu Justisa, Grupo Feto Parlamentár, Parlamentu Nasionál iha lejislatura datoluk no instituisaun sira seluk.

“Inestu partikularmente nu'udar forma ida hosi violénsia bazeia ba jéneru ne'ebé aat no fo'er liu iha sosiedade tanba viola no prejudika valores sosiál-umanu oioin no haterus vítima sira nia vida tomak; tanba ne'e ita presiza artigu espesífiku no explisita ida iha lei penál atu regula kona-ba asuntu ne'e sein hare ba vítima ninia idade ka konsentimentu” dehan Luis de Oliveira Sampaio, Direitór Ezekutivu JSMP.

Desde tinan 2012 – Maiu 2018 JSMP monitoriza kazu inestu hamutuk 49. JSMP fiar katak númeru ne'e representa deit porsaun ki'ik hosi kazu inestu barak liu ne'ebé seidak deskobre iha Timor-Leste. Ho dezafiu oioin ne'ebé ita nia sistema infrenta hela hanesan; limitasaun informasaun kona-ba sistema justisa formal, ameasa no koasaun hosi arguidu, estigmasaun sosial hosi familia no comunidade halo vítima barak mak sente la seguru atu lori sai sira nia kazu ba sistema justisa formal.

Tanba ne'e ekipa advokasia husu Ministru Justisa atu aseguara katak durante mandatu tinan lima ne'e Ministériu Justisa sei fo prioridade ba hametin Timor-Leste nia lei penál ne'ebé konsidera importante hodi responde ba problema ne'e iha maneira ida efetivu.

Durante audiénsia ne'e, ekipa advokasia ne'e informa ba Ministru Justisa katak husi rezultadu monitorizasaun JSMP no akompañamentu legál husi ALFeLa ba vítima feto no labarik sira deskobre katak provizaun sira iha Kódigu Penál ladun fó protesauun adekuada ba feto no labarik sira ne'ebé sai vítima iha kazu inestu, liuliu sira ne'ebé atinze no idade tinan 14 ba leten.

Aleinde ne'e ekipa ne'e mós fó-hanoin katak Estadu Timor-Leste iha obrigasaun internasionál tuir konvensaun CEDAW no Konvensaun Direitu ba Labarik ne'ebé Timor-Leste ratifika ona no nu'udar membru permanente ba konvensaun sira ne'e.

Husi rezultadu monitorizasaun no akompañamentu sira ne'e JSMP no ALFeLa hamutuk dezenvolve submisaun conjunta ida hodi ható'o ba Ministériu Justisa, Parlamentu Nasionál ho objetivu atu halo revizaun ba Kódigu Penál hodi kriminaliza inestu, inklui provizaun sira kona-ba krime seksuál kontra menór, koasaun seksuál, violasaun seksuál, no fatór agravante sira iha ofensa seksuál no asaltu seksuál.

Bainhira responde ba preokupasaun hirak ne'e, Sr. Carceres informa ba ekipa advokasia katak, preokupasaun ba asuntu sira relasiona ho alterasaun Kódigu Penál ne'e sei konsidera iha Ministériu Justisa nia planu reforma lejislativu no judisiáriu. Sr. Carceres hanoin katak asuntu ne'e importante tebes atu bele konsidera iha programa reforma lejislativu, la'os halo alterasaun ba asuntu inestu de'it, maibé di'ak liu halo alterasaun kumulativu ka alterasaun konjuta iha Kodigu Penál ne'ebé refleta situasaun réal Timór Leste nian. Tanba ne'e, nia husu atu JSMP no ALFeLa ho grupu advokasia ajuda hodi indetifika artigu sira ne'ebé la relevante ona ho situasaun moris povu Timór-Leste nian iha Kodigu Penál hodi apresenta fali ba Diresaun Nasionál ba Asuntu Lejislasaun Ministériu Justisa, hodi haree no diskute asuntu sira ne'ebé ita hotu hanoin importante atu halo mudansa tuir evolusaun sosiedade no nesesidade ita nia sistema nian.

Audensia ne'e, konklui ho ekipa advokasi entrega relatóriu kona-ba "Inestu iha Timor Leste: Krime ida ne'ebé lahetan rekoñesimentu nomos submisaun kona-ba alterasaun kódigu penál ba Exelénsia Ministru Justisa.

Atu hetan informasaun kompletu bele kontaktu:

Luis de Oliveira Sampaio

Diretór Ezekutivu JSMP

Email: luis@jsmp.tl

www.jsmp.tl